

**PEMBERITAHU PERTANYAAN
DEWAN RAKYAT, MALAYSIA**

DARIPADA : DATUK WIRA HAJI AHMAD BIN HAMZAH

PERTANYAAN : LISAN

TARIKH : 01.04.2014

Datuk Wira Haji Ahmad bin Hamzah [Jasin] minta **MENTERI KEWANGAN** menyatakan adakah langkah Kerajaan menstrukturkan semula ekonomi negara termasuk rasionalisasi subsidi dan bantuan terus kepada golongan sasar tidak akan membebankan rakyat sebaliknya mampu melonjakkan pertumbuhan ekonomi negara dan membawa negara keluar daripada perangkap "berpendapatan sederhana".

JAWAPAN:

Tuan Yang Dipertua,

Saya mohon menjawab pertanyaan **YB Ahli Parlimen Jasin** bersama-sama dengan pertanyaan **YB Ahli Parlimen Selayang** yang dijadualkan pada 2 April, **YB Ahli Parlimen Batu Sapi** dan **YB Ahli Parlimen Bagan Serai** pada 8 April serta **YB Ahli Parlimen Keningau** dan **YB Ahli Parlimen Libaran** pada 9 April 2014. Ini memandangkan keenam-enam soalan tersebut menyentuh perkara dan isu yang sama.

Tuan Yang Dipertua,

Pertumbuhan ekonomi telah menghasilkan banyak manfaat kepada rakyat dan negara terutamanya dari segi peningkatan kualiti hidup, pendidikan dan peluang pekerjaan. Kejayaan ini telah dicapai melalui perancangan yang teliti dalam merangka dan melaksanakan sesuatu dasar serta penyampaian perkhidmatan Kerajaan yang efektif. Semua dasar yang digubal adalah untuk memastikan ekonomi negara terus kekal kukuh, mencatat pertumbuhan yang mampan dan meningkatkan kesejahteraan rakyat.

Justeru, dalam keadaan ekonomi dunia yang kian mencabar dan kompetitif, Kerajaan perlu merangka pelan strategik supaya pertumbuhan ekonomi negara terus kekal sihat. Kerajaan telah menggubal satu rangka tindakan transformasi nasional untuk membolehkan negara keluar daripada perangkap ekonomi berpendapatan sederhana dan seterusnya mencapai status negara maju serta berpendapatan tinggi menjelang tahun 2020. Antara inisiatif utama untuk mencapai objektif tersebut adalah melalui Program Transformasi Kerajaan (GTP), Program Transformasi Ekonomi (ETP) dan Program Transformasi Komuniti (CTP). Pelaksanaan program-program ini akan memastikan prospek pertumbuhan ekonomi yang berterusan ke arah mencapai sasaran negara berpendapatan tinggi dengan pendapatan per kapita USD15,000 menjelang tahun 2020.

Sememangnya, sejak empat tahun dahulu, Kerajaan juga telah mengambil keputusan untuk melaksanakan **Program Transformasi Fiskal** atau **FTP**. FTP bermaksud mengukuhkan kemampunan kedudukan kewangan Negara termasuk mengurangkan defisit fiskal dan hutang Negara serta

menjamin kesejahteraan rakyat secara menyeluruh dan bersifat holistik. Perlu diketahui, defisit fiskal bukannya satu perkara yang tidak baik. Kedudukan fiskal negara telah berada pada tahap defisit sejak akhir tahun 1990an dan keadaan ini tidak menghalang negara daripada terus membangun. Walau bagaimanapun, Kerajaan perlu memastikan kewangan negara sentiasa berdaya tahan untuk menghadapi sebarang krisis ekonomi pada masa hadapan. Ini kerana apabila hutang negara terkawal, ia akan memberi keyakinan kepada pelabur untuk terus melabur di negara kita, khususnya dalam pasaran modal atau *capital market*. Sebaliknya, jika penarafan kedaulatan Negara (*sovereign rating*) diturunkan, ia akan memberi implikasi kos pinjaman yang meningkat dan memberi tekanan kepada nilai matawang Negara. Justeru itu, pasaran modal seperti ekuiti dan bon akan terjejas. Semua ini akan membawa kepada kemudaratkan rakyat akhirnya.

Semestinya, langkah transformasi fiskal ini termasuk rasionalisasi subsidi, adalah untuk meningkatkan kecekapan perbelanjaan dan pengagihan sumber kewangan Kerajaan. Pada masa kini, kebanyakan negara telah mengambil langkah drastik untuk mengurangkan defisit fiskal mereka, namun Malaysia mengambil pendekatan secara beransur-ansur (*gradualism*) bagi menyokong pertumbuhan ekonomi yang berterusan dan pada masa yang sama berupaya mengekalkan kesejahteraan rakyat.

Sebenarnya, langkah rasionalisasi subsidi adalah perlu kerana perbelanjaan subsidi semakin meningkat. Misalnya, pada tahun 2010, Kerajaan telah membelanjakan RM23.1 bilion atau 15% daripada keseluruhan perbelanjaan mengurus untuk membiayai subsidi, bantuan dan insentif. Manakala pada tahun 2013, hanya dalam tempog 3 tahun

sahaja jumlahnya telah meningkat kepada RM43.3 bilion atau 21% daripada belanja mengurus. Peningkatan ini adalah selari dengan peningkatan harga minyak mentah dunia dan pertambahan jumlah bilangan kenderaan. Pemberian subsidi yang begitu besar akan menjelaskan kedudukan kewangan Negara dan menyebabkan ianya tidak *sustainable* dalam jangka masa panjang.

Oleh itu, pembaharuan fiskal adalah penting bagi mengukuhkan kedudukan kewangan dan memastikan sasaran defisit fiskal pada paras 3.5% kepada Keluaran Dalam Negeri Kasar (KDNK) pada tahun ini, 3% pada tahun 2015 dan bajet berimbang (*balanced budget*) pada tahun 2020 tercapai. Komitmen tersebut adalah penting bagi memastikan agar paras hutang sentiasa tidak melebihi 55% daripada KDNK dan menjamin kemampanan fiskal jangka panjang negara.

Makanya, langkah rasionalisasi subsidi telah dilaksanakan dengan berhati-hati bagi memastikan kesan yang minimum dan tidak membebankan rakyat, terutamanya kepada golongan berpendapatan rendah dan sederhana rendah. Pelaksanaan rasionalisasi subsidi juga mengambil kira pelbagai aspek termasuk kadar inflasi, kos sara hidup dan kedudukan ekonomi global semasa serta mekanisme sasaran (*targeting mechanism*).

Tuan Yang Dipertua,

Hakikatnya, sebahagian daripada penjimatan rasionalisasi subsidi akan digunakan bagi membiayai perbelanjaan pembangunan yang dapat meningkatkan kapasiti produktif negara seperti pembinaan infrastruktur pengangkutan, termasuk jalan-jalan luar bandar dan bandar, hospital dan

perumahan. Selain itu, Kerajaan akan dapat membina lebih banyak sekolah dan institusi pendidikan serta latihan yang amat diperlukan dalam pembangunan modal insan.

Jadinya, penjimatan yang sebahagian lagi pula akan dipulangkan semula kepada rakyat terutama golongan berpendapatan rendah dan mereka yang mudah terjejas supaya kesan kenaikan kos sara hidup dapat diimbangi. Hasilnya, Kerajaan telah meningkatkan dan meluaskan pemberian BR1M dalam Bajet 2014. Semestinya, pelaksanaan program BR1M ini akan diperkemaskan lagi supaya ianya memberi manfaat yang terbaik kepada rakyat pada masa akan datang.

Kerajaan akan terus memberi subsidi bagi barang keperluan dan perkhidmatan asas seperti subsidi harga beras, subsidi minyak masak, subsidi kadar elektrik bagi penggunaan bulanan RM20 ke bawah dan subsidi kadar tol. Tambahan pula, insentif hasil tangkapan nelayan dan insentif pengeluaran padi juga diteruskan.

Berkait itu, terdapat bantuan lain yang diterima secara terus oleh rakyat antaranya adalah bantuan persekolahan, bantuan makanan dan minuman, bantuan buku teks dan baucar buku. Selain itu, Kerajaan juga menyediakan bantuan kepada golongan orang asli serta subsidi pengangkutan udara ke kawasan pedalaman Sabah dan Sarawak. Contohnya, bagi tahun 2014, sebanyak RM39.4 bilion atau hampir 20% daripada perbelanjaan mengurus Kerajaan diperuntukkan untuk subsidi, insentif dan bantuan kepada rakyat.

Di samping subsidi dan bantuan terus, Kerajaan terus-menerus memberi bantuan dalam bentuk perkhidmatan sosial dengan bayaran paling minimum atau percuma. Antara contohnya adalah rawatan perubatan di klinik dan hospital Kerajaan, pendidikan di sekolah rendah, menengah dan institusi pengajian tinggi awam serta biasiswa dan pinjaman pelajaran.

Sesungguhnya, Kerajaan sedar akan kepentingan menjelaskan Program Transformasi Fiskal atau FTP ini kepada rakyat. Sejak September 2013, Kerajaan tidak pernah berhenti memberi penjelasan mengenai rasional langkah mengukuhkan kedudukan fiskal negara, khususnya rasionalisasi subsidi dan pelaksanaan Cukai Barang dan Perkhidmatan (GST), serta inisiatif bagi mengurangkan beban rakyat kesan daripada FTP ini. Penjelasan tersebut tidak terhad di dalam Dewan yang mulia ini sahaja, malahan telah diperluaskan ke seluruh negara melalui pelbagai media massa. Ini termasuk penjelasan yang telah dan sedang dilakukan melalui siri ceramah dan taklimat di seluruh negara dengan kerjasama persatuan-persatuan pengguna dan pertubuhan-pertubuhan bukan Kerajaan (NGO).

Tuan Yang Dipertua,

Secara keseluruhannya, langkah-langkah yang telah dinyatakan tadi, jelas menunjukkan bahawa Kerajaan sentiasa komited untuk mengukuhkan kedudukan fiskal negara dengan melaksanakan pelbagai langkah pembaharuan, demi kesejahteraan rakyat. Semua langkah yang dilaksanakan oleh Kerajaan adalah bagi memastikan negara mencapai status negara maju berpendapatan tinggi dengan rakyat dapat menikmati kualiti hidup yang lebih baik.